



## **Clwb Mynyddda Cymru**

*Elusen gofrestredig rhif 1190243*

### **Adroddiad Blynyddol yr Ymddiriedolwyr am y flwyddyn 2022 - 2023**

#### **Cyfansoddiad ac Amcan**

Mae Clwb Mynyddda Cymru wedi ei sefydlu fel Sefydliad Corfforedig Elusennol. Ei amcan ydi hyrwyddo chwaraeon amatur, sef mynyddda, yng Nghymru er budd y cyhoedd, yn arbennig ond nid yn unig trwy ddarparu cyfleon ar gyfer mynyddda trwy gyfrwng y Gymraeg.

#### **Ymddiriedolwyr**

Yr ymddiriedolwyr yn ystod y flwyddyn oedd:

Stephen Williams – Cadeirydd  
Elen Huws – Is-gadeirydd  
Richard Roberts – Ysgrifennydd Gweithgareddau  
Iolo ap Gwynn – Ysgrifennydd y Wefan  
Iolo Roberts – Ysgrifennydd Cyffredinol  
Dilys Phillips – Trysorydd  
Gethin Rowlands – aelod o'r pwyllgor  
Ariannell Parry – aelod o'r pwyllgor  
Dewi Hughes – aelod o'r pwyllgor  
Raymond Griffiths – aelod o'r pwyllgor  
Dwynwen Pennant – aelod o'r pwyllgor  
Sioned LI Jones – aelod o'r pwyllgor  
Keith Roberts – aelod o'r pwyllgor

#### **Llywodraethu**

Yr ymddiriedolwyr yn cyfarfod fel Pwyllgor sy'n rheoli gweithgareddau'r Clwb.

Cynhaliwyd tri chyfarfod arferol o'r Pwyllgor yn ystod y flwyddyn sef yn mis Ionawr, Mai a Medi ac fe gynhaliwyd un cyfarfod brys ym mis Hydref, i gyd drwy gyfrwng Zoom. Mae'r drefn o ddefnyddio Zoom i gynnal ein cyfarfodydd yn gweithio'n dda ac mae'n caniatáu i aelodau sy'n byw ym mhob rhan o Gymru ymuno â'r cyfarfodydd yn eitha rhwydd.

Gan mai un o brif gyfrifoldebau'r Pwyllgor yw cadw llygaid ar faterion ariannol y Clwb, ceir diweddariad gan y Trysorydd ym mhob cyfarfod. Roedd gan y Clwb swm

o £881.41 yn ei goffrau a dderbyniwyd fel rhodd er cof am Gareth Pierce gan ei deulu. Cytunodd y Pwyllgor eleni y gellid defnyddio'r arian yma i gefnogi'r Urdd i drefnu cwrs penwythnos o fynydda a gweithgareddau awyr agored i bobl ifanc drwy gyfrwng y Gymraeg yng Nglan Llyn ar 22-24 Medi 2023, math o weithgaredd a fyddai wedi bod yn agos at galon Gareth.

Yn y Cyfarfod Blynyddol y llynedd cafwyd nifer o awgrymiadau gan aelodau sef:

- cynnal y Cyfarfod a Chinio Blynyddol ar noson yn ystod yr wythnos e.e nos Wener heb gael taith yn gysylltiedig â'r digwyddiad
- cynnal y Cyfarfod Blynyddol mewn safle yn y Canolbarth gyda'r gobaith y gellid denu aelodau o'r de a'r gogledd iddo
- gyrru neges i atgoffa aelodau i gofrestru eu ffonau symudol gyda rhif argyfwng 999 fyddai yn cynorthwyo i gysylltu â'r gwasanaethau brys mewn argyfwng

Fe ystyriwyd y materion hyn gan y Pwyllgor ac fe gytunwyd ar y canlynol :

- i. bod y pwyllgor yn ffafrio parhau i gynnal y Cyfarfod a Chinio Blynyddol ar ddydd Sadwrn gyda thaith yn ystod y dydd yn gysylltiedig a dylid sicrhau fod y daith yn lleol ac yn addas o safbwynt amser
- ii. bod peryg, o gofio bod canran helaeth o aelodau'r Clwb yn byw yng Ngogledd Cymru, y gallai symud y Cyfarfod Blynyddol i leoliad yng Nghanolbarth Cymru olygu na fyddai canran sylweddol yn mynychu gan nad oes digon o aelodau yn byw yn y de i wneud fyny am y diffyg yma. Fodd bynnag, gellid ystyried cynnal y Cyfarfod Blynyddol yn rhan ddeheuol Gogledd Cymru megis ardal Dolgellau a allai fod rhywfaint yn fwy cyfleus i aelodau'r de.
- iii. gofyn i'r Ysgrifennydd Gweithgareddau gynnwys neges am gofrestru ffonau symudol gyda rhif argyfwng 999 yn un o'i negeseuon e-bost i'r aelodau.

Ym mis Ionawr fe groesawyd Richard i'w gyfarfod cyntaf fel ein Ysgrifennydd Gweithgareddau newydd ac mae wedi bod yn brysur iawn yn ystod y flwyddyn, nid yn unig yn trefnu'r rhaglen ond ar gais y Pwyllgor fe gyflwynodd drefn newydd o raddio teithiau a fydd, gobeithir, yn gwneud natur y teithiau yn gliriach yn enwedig i aelodau newydd.

Mae'r Pwyllgor hefyd wedi cytuno i barhau â'i aelodaeth o'r Bartneriaeth Awyr Agored. Gyda'u cymorth mae nifer o aelodau'r Clwb wedi penderfynu gwneud y cwrs Arweinydd Mynydd (Haf) ac wedi dechrau ar eu hyfforddiant. Roedd y Pwyllgor o'r farn ei bod yn bwysig rhoi cefnogaeth i aelodau wella eu sgiliau arwain a fydd yn sicrhau fudd i weithgareddau'r Clwb.

Cynhaliwyd yr Eisteddfod Genedlaethol ym Moduan eleni ac roedd Dwynwen wedi trefnu i Catrin Meurig draddodi Darlith Goffa Llew Gwent ar rai o'i hanturiaethau mewn rasys rhedeg heriol iawn y bu'n cystadlu ynddynt. Hefyd fe gynhaliwyd Taith Goffa Gareth Pierce gan y Clwb yn ystod wythnos yr Eisteddfod gyda 26 yn ymuno â thaith ar yr Eifl (yn y niwl!!!) ar y 9fed o Awst dan arweiniad Iolo Roberts.

Cynhaliwyd cyfarfod arbennig o'r Pwyllgor ym mis Hydref er mwyn ystyried canllawiau'r Clwb ar gyfer teithiau preswyl mewn perthynas â'r ymweliad â Crianlarich yn Chwefror 2024. Gan mai arhosiad mewn gwesty oedd dan sylw fe gytunwyd byddai ychwanegu £2 y pen y noson i gost y daith yn ddigonol er mwyn sicrhau fod arian wrth gefn i warchod y Clwb rhag ofn y byddai'r daith yn gwneud colledion.

Mae cofnodion cyfarfodydd y Pwyllgor a rhai'r Cyfarfodydd Blynnyddol i'w gweld ar wefan y Clwb, gweler y ddolen isod:

<http://www.clwbmynyddacymru.com/Dogfennau.htm>

## **Recriwtio ymddiriedolwyr**

Y Cyfarfod Blynnyddol sydd yn cadarnhau aelodaeth y Pwyllgor ac felly'n penodi'r ymddiriedolwyr. Yn ôl y cyfansoddiad mae traean o aelodau'r Pwyllgor (yr ymddiriedolwyr) yn ymddeol yn flynyddol, sef 4 aelod, er bod hawl i unrhyw un ohonynt gael ei ail-benodi. Y rhai sydd i ymddeol yw'r rhai sydd wedi bod yn eu swydd hiraf. Mae'n agored i unrhyw aelod gynig i wasanaethu ar y Pwyllgor drwy gysylltu â'r Ysgrifennydd Cyffredinol cyn y Cyfarfod Blynnyddol.

Yng nghyfarfod blynnyddol 2022 rhoddodd Eryl Owain a Iona Evans y gorau i fod yn ymddiriedolwyr. Diolchwyd yn gynnes iddynt am eu gwasanaeth; yn achos Eryl cafwyd cyfle i gydnabod ei waith clodwiw fel Ysgrifennydd Gweithgareddau dros gyfnod o 10 mlynedd.

Rhoddwyd croeso i ddau ymddiriedolwr newydd i gymryd eu lle sef Gethin Rowlands ac Ariannell Parry.

## **Gweithgareddau**

Ers dechrau'r flwyddyn, trefnwyd 55 o deithiau ar benwythnosau a 12 ar ddyddiau Mercher. Diolch arbennig i'r wyth aelod sydd wedi arwain taith am y tro cyntaf yn ystod y flwyddyn. Mae hyn yn argoeli'n ardderchog o ran dyfodol y Clwb.

Trefnwyd taith flasu – Moel Siabod – ddechrau mis Mai ac fe ysbrydolwyd rhai o'r 'blaswyr' i ymaelodi. Mae un ohonynt nhw eisoes wedi arwain taith i'r Clwb!

Ers dechrau mis Medi, mae teithiau'r clwb yn cael eu graddio yn unol â lefel eu her. Mae hyn yn helpu darpar-gerddwyr benderfynu p'un ag ydyn nhw am ymuno â thaith ai peidio.

Trefnwyd dwy daith breswyl i'r Alban.

- Taith aeaf i Crianlarich. Ym mis Chwefror, bu 20 o aelodau yn dringo nifer helaeth o gopaon rhwng ardal Glen Lyon yn y dwyrain a Glencoe yn y gorllewin.
- Taith haf i Roy Bridge. Mwynhaodd 11 o aelodau dywydd hafaidd dros ben ddiwedd mis Mai a llwyddwyd i esgyn nifer helaeth o gopaon.

Diolch yn fawr iawn i Gareth Everett Roberts (Crianlarich) a Keith Roberts (Roy Bridge) am drefnu'r ddwy daith ac i Anna George am lunio adroddiadau ardderchog sy'n croniclo'u llwyddiant.

Cynhelir taith arall i Crianlarich ar 17-24 Chwefror 2024 a thaith i Hawes, Parc Cenedlaethol y Yorkshire Dales ar 6-10 Mai.

Treuliodd deg o aelodau'r Clwb chwe niwrnod yn derbyn hyfforddiant a oedd yn cynnwys noson stormus a gwlyb o fordwy a gwersylla! Byddan nhw'n treulio cyfnod arall o asesiad ar y mynyddoedd maes o law. Trefnir y cyrsiau ardderchog hyn mewn cydweithrediad â'r Bartneriaeth Awyr Agored.

## **Cyfathrebu a chysylltu**

Bu'r flwyddyn ers Tachwedd 2022 yn un eithaf prysur a chofnodwyd hanesion 48 o deithiau a gweithgareddau ar y wefan – ynghyd â'r lluniau cyferbyniol ar Flickr. Bu'r wefan a'r cyfrif Gweplyfr/Facebook yn ddefnyddiol i gysylltu ag aelodau ac i ddarganfod aelodau newydd. Bu hefyd yn ddefnyddiol pan oedd angen diweddarau'r Rhaglen – weithiau ar y funud olaf! Mae'r wefan yn dal yn gydnaws â ffonau clyfar a llechi iOS ac Android yn ogystal â porwyr ar bob math o gyfrifiaduron. Mae'r 'ap' ar gyfer ffonau clyfar a phadau iOS ac Android, a luniwyd gan Rhys Jones, yn dal ar gael (drwy ddefnyddio'r cyfarwyddiadau ar y wefan) ac yn boblogaidd fel dull hawdd o gyrchu gwybodaeth o'r wefan ble bynnag yr ydych (wel, bron iawn!).

Diolch i bawb wnaeth ddanfod adroddiadau am hanes y teithiau gyda lluniau gwyh. Cofiwch fod tudalen Newyddion ar y wefan hefyd ac fod croeso i bawb ddanfod manylion neu hanes o unrhyw beth all fod o ddiddordeb i'r aelodau.

Cofnodir manylion defnydd pob rhan o wefan y Clwb gan Google Analytics. Golyga hyn fod gennym wybodaeth hynod o gyflawn o sut mae'r wefan yn cael ei defnyddio, gyda dadansoddiad manwl o natur y defnyddwyr (ond dim manylion personol ar gael) gan gynnwys yr offer a ddefnyddir.

Ers Tachwedd 2022, defnyddiwyd y wefan dros 15k o weithiau gan tua 4.5k o ddefnyddwyr (y rhan fwyaf o'r DG a nifer o'r UDA a rhai o wledydd eraill). Nid oes gwybodaeth at gael parthed rhywedd bellach! Bu'r defnydd yn weddol gyson drwy'r flwyddyn ac yn pegynnu pryd roedd gweithgaredd gan y Clwb. Defnyddiwyd pob math o offer ar gyfer yr ymweliadau. Tua'r un nifer o gyfrifiaduron yn defnyddio Windows a rhai Mac. Tua 62 % yn defnyddio cyfrifiaduron symudol, 30 % ar gyfrifiaduron pen-desg a'r gweddill ar tabledi/lechi.

Bellach mae ganddom 1,108 o ddilynwyr cyson ar ein tudalen Gweplyfr/Facebook. Mae'r dadansoddiad yn dangos fod 53.70% o'r dilynwyr yn ferched a 46.30% yn ddynion gyda'r mwyafrif yn yr oedran 45-54, gyda'r oedran 35-44 yn ail agos.

Bellach hefyd, mae tua 10,907 o luniau a dynnwyd ar ein teithiau ers 2005 gan aelodau'r clwb, i gyd ar gael drwy'r wefan ar lwyfan Flickr. Gall aelodau lawrlwytho unrhyw un o rhain ar gyfer defnydd personol.

Mae ein cyfrifon Gweplyfr/Facebook, X (Trydar Twitter) ag Instagram yn dal yn weithgar, i gyd yn cyd-lynu efo'r wefan. Diolch hefyd i'r rhai sy'n gofalu am gyhoeddi gwybodaeth ar X ac Instagram. Cyhoeddir y rhaglen gweithgareddau a hanesion am bob gweithgaredd, ynghyd â Newyddion, ar ein gwefan. Cofiwch dagio @Clwb Mynydda Cymru pan yn negesu ar y gwefannau cymdeithasol. Cofiwch hefyd nodi eich bod am ddilyn ein cyfrif Gweplyfr/Facebook a hoffi a/neu rannu'r hanesion ag eraill.

Cofiwch lawr lwytho'r 'ap' ar gyfer iOS neu Android, sy'n cysylltu'n uniongyrchol â gwefan y clwb – cyfarwyddiadau ar sut i wneud hynny ar gael ar y wefan [<http://www.clwbmyddacymru.com/Cysylltu.html>].

Os oes gan unrhyw aelod sydd â phrofiad o luniadu/cynnal gwefannau (defnyddir meddalwedd Adobe Dreamweaver i olygu'r wefan) ddiddordeb mewn cynorthwyo gyda'r gwaith byddai'r Ysgrifennydd Gwefan yn ddiolchgar o glywed ganddo/i.

Mae'r wefan yn gofnod pwysig o weithgareddau'r clwb dros y blynyddoedd. Daliwch ati i gefnogi ein gwefan a'r tudalennau gwefannau cymdeithasol. Mae'n bwysig lledaenu'r wybodaeth am weithgareddau'r clwb yn y dulliau hyn, gan mai dyma'r unig ffordd y daw cymaint ag sy'n bosib o bobl i wybod am yr hyn sy'n cael ei ddarparu.

## **Cyllid**

Mae sefyllfa ariannol y Clwb yn gadarn gan fod y tâl aelodaeth wedi cynyddu i £25 y pen o Ionawr 2023 ymlaen. Mae hyn yn ddigonol i gwrdd â'r cynnydd yn nhâl aelodaeth y Clwb i'r Cyngor Mynydda Prydeinig (CMP) sydd bellach yn cynyddu eu ffioedd i aelodau clybiau yn unol â chwyddiant yn flynyddol. Gobaith y Pwyllgor yw y gellir cadw'r tâl aelodaeth yn £25 cyhyd â phosibl.

Y prif ffynhonnell incwm ydi'r tanysgrifiadau. Yn ystod y flwyddyn derbyniwyd £25 o dâl aelodaeth gan 259 aelod ynghyd ag £20 o daliad hwyr ar gyfer 2022. Yn ogystal cafwyd taliadau o £1195 gan rai oedd heb gynyddu eu harcheb banc i £25 ac sydd felly ddim yn gymwys i dderbyn aelodaeth o'r Clwb. Mae rhain yn cynnwys 34 yn talu £20, 30 yn talu £15 a 7 yn talu symiau llai na hynny.

Roedd y taliad i'r Cyngor Mynydda Prydeinig yn £22.25 yr aelod.

Cafwyd derbyniadau o £1252 ar gyfer cinio blynyddol 2022 a thaliadau o £1290 gan arwain at golled bach o £38. Derbyniwyd £490 at ginio blynyddol 2023; bydd y taliad yn ei erbyn i'w weld yng nghyfrifon 2023-24.

Derbyniwyd £2120 at daith Roybridge ym mis Mai a thalwyd £2127 (sef colled bach o £7). Daeth rhai blaendaliadau am daith Crianlarich yn Chwefror 2024 i law cyn i'r cyfrifon gau; bydd y taliad yn eu herbyn i'w weld yng nghyfrifon 2023-24.

Cafwyd llog o £48.78 (cyfrif cadw) a rhoddion gan (gyn)aelodau o £70.

Daeth costau rhedeg y Clwb (costau banc, gweinyddol a gwefan) i £736.81 am y flwyddyn. Ar ben hynny talwyd £150 i ymuno â'r Bartneriaeth Awyr Agored a £100 am logi pabell y Cymdeithasau yn yr Eisteddfod.

## **Cronfeydd**

Mae gan y Clwb £9463.24 yn y banc. Mae hyn yn cynnwys Cronfa Goffa Gareth Pierce (£881.41), blaendaliadau am ginio blynyddol 2023 a thaith Crianlarich (£3500) a chronfa gyffredinol o £5081.83. Mae'r gronfa gyffredinol wedi cynyddu o'r hyn oedd flwyddyn yn ôl oherwydd y codiad yn y tâl aelodaeth a'r cynnydd canlynol yn nifer y caredigion.

Mae'r Clwb yn cadw arian wrth gefn yn y gronfa gyffredinol er mwyn sicrhau llif arian digonol (gan fod rhaid weithiau talu ymlaen llaw am lety ar deithiau preswyl cyn casglu arian gan y rhai sy'n mynychu) ac hefyd i warchod yn erbyn gwariant annisgwyl.

Stephen Williams  
Cadeirydd

(ar ran yr ymddiriedolwyr)

Dyddiad: 11/11/23

CLWB MYNYDDA CYMRU - adroddiad ariannol 2022/23

(Elusen gofrestredig rhif 1190243)

Derbyniadau				(2021/22)	Taliadau				(2021/22)
		£	£				£	£	
Aelodaeth:	Aelodau	6,495.00		5,740.00	Aelodaeth:				
	Caredigion	1,195.00		620.00					
			7,690.00	6,360.00					
						Cyngor Mynydda Prydeinig		5,707.15	5,719.00
Cinio blynyddol 2022			1,252.00	971.00	Cinio blynyddol 2022			1,290.00	1,240.00
Cinio blynyddol 2023 (taliadau ymlaen llaw)			490.00						
Teithiau:	Roybridge		2,120.00	91.00	Teithiau:	Roybridge		2,127.00	91.00
	Crianlarich -blaendaliadau		3,010.00						
Incwm arall:	Llog banc		48.78	1.73	Gwariant arall:	Costau banc	60.80		52.08
	Rhoddion		70.00			Gweinyddol	377.87		192.00
						Gwefan	298.14		226.79
						Eisteddfod 2023 (darlith)	100.00		
						Partneriaeth Awyr Agored	150.00		150.00
						Prynu diffibriliwr			1,878.00
						Timau achub			500.00
						Cwrs cymorth cyntaf			120.00
								986.81	3,118.87
Mewn llaw 1 Hydref 2022:					Mewn llaw 30 Medi 2023:				
	Cyfrif cyfredol	860.99				Cyfrif cyfredol	3,882.03		
	Cyfrif cadw	4,032.43				Cyfrif cadw	5,581.21		
			4,893.42	7,603.41				9,463.24	4,893.42
			19,574.20	15,062.29				19,574.20	15,062.29

Dilys Phillips  
Trysorydd  
16/10/2023

George Jones  
Archwiliwr  
16/10/2023